

92. Hauptversammlung

Samstag, 25. Oktober 2025 - Restaurant Eggli

Jahresrückblick Saison 2024/25

Hauptversammlung

Am 26. Oktober 2024 hend me do im Eggli obe die 91. HV döfe abhalte. De Ihladig sönd rond 80 Mitglieder gfolgt ond hend die wichtig Ufgob zo Gunste vo ösem Verein wohrgno. 8 Ihtrett sönd 11 Ustrett gegenübergstande. Ösen Verein zöllt drom aktuöll 382 Mitglieder. De abtretend 1. Beisetzter, de Silvan Graf, het chöne dö de Michael Ramseier esetzt werden. Als Ersatz fö di demissionierend Kassierin, d'Simona Sutter, isch de Rouven Inauen gwöhlt wode. Well dei drus en Interessekonflikt mit de 2. Revisorin, de Myrta Inauen, entstande isch, isch sie spontan zroggtrette. Seb Amt het chöne dö de Pascal Inauen bsetzt wede. D'HV het de Ahschaffig vonere neue Akkubohrmaschine zuegstomme ond d'Kommission het chöne di neue Startnummere vostölle ond öbe d'Uswahl vome neue Skiclubahzog informiere.

Noch em offiziölle Tääl vo de HV het de Pat vo de Band QL vö di musikalisch Ondehaltig gsoged. Me hend e witeri glungi ond loschtigi HV im Eggli döre ha.

Clubausflug St. Anton am Arlberg

Wie all am eschte Dezemberwochenend hemme wide s'eschtmol als Verein töfe ufd Pischte. Di letscht Saison hets ös wideremol öbe d'Grenze is Vorarlbergisch verschlage. Me sönd ad Saisoneroöffnig im St. Anton am Arlberg. 21 Tälnehmerinne ond Tälnehmer hendsich dra here gwoght. D'Östricher hend fö ös enad scho ebe schö Schnee organisiert kha, abe leide hends nüd fös guet Wetter glueget. Isch am Samstig föchelich vehange gse ond me het kum nebes gse. Dass denn no en Hufte nüd ase versierti Skifahrer ondewegs kha het, het nüd unbedingt gholfte, hemme doch eso echli Menschenalalom bi schlechte Sicht mösse betriebe. Me hend abe glich öseri eschte Schwümg chöne gnüsse ond de Schnee i volle Zög gnosse. Im Nomittag inne hemme ös denn abe glich no echli anderne Beschäftigunge zuegwandt. Wome denn tatsächlich alli diskussionslos pünktlich bim Znacht uftaucht sönd hemme döfe en super Znacht zo ös neh. Gstächt vom Znacht hemme ös denn no is Nachtlebe gwogt. Em nöchschte Tag sömme denn nomol ufd Pischte. Wells öbe d'Nacht nomel ebe gschneit het, hemme d'Pischte döfe voll gnüsse. Wa isch sös no ewähnenswert? Ahjo: Nochem Usflog hend denn schono e paa mösse lokali Sportfachgschäft ufsueche zom erni Usröschtig wide z'komplettiere. Alls i Allem hemme abe döfe e super organisierts Wochenend uf de Pischte gnüsse.

scs active Davos

Am Stephistag hend me z'Davos en traumhafts Skitägli vewütscht. Acht Persone hend die perfekte Verhältnis ond s allebescht Wetter gnosse. Wells sös enad au kum Lüüt uf de Pischte kha het, sönd me gsponne viel zom fahre cho. Entsprechend hemme denn em Obed nomme möge vehocke ond sönd föchelich müede em halbi Föfi uf de Heeweg.

Eggliabfahrt

Ahfang Johr wä denn d'Eggliabfahrt ufem Programm gstande. Seb isch abe echli e Üebig gse, ich chas eu säge. Em Fritigmorge hets gsponne viel Schnee anigwoffe ond me hend s'Renne chönne ahsäge. De ganz Samstig sönd en Hufte Hölfer dra gse zom e Pischte anistölle wo nöcheres a perfekt gse isch. Me hend denn natürlich au usgsteckt ond sös sowit vorbereitet wies gad gange isch. Nore isch d'Nacht cho.

Skiclub Steinegg

Bis öppe em 11i isches liecht am schneiele ond chalt gse. Leider Gottes hets denn abe gwaamed ond ahgfangen regne. Bis am Morge, wome ös denn wide troffe hend, het öseri Pischte leide nomme ase guet usgseh. Noch echli Hin ond Her hemme ös schweren Herzens mösse dezue entscheide zom d'Eggliabfahrt verschiebe. Seb isch e gueti Idee gse, well bisme denn alls wide verummt hend, isch enad ke Schnee meh omme gse. Immerhin hemme wide alli Torflagge gwäsche.

Zwo Woche spöte wä denn s'Verschiebedatum inträged gse, abe do hets ase lötzel Schnee kha dassme ös e Ahsag nüdemol hend mösse öbelegge. Drom hemme dasjohr leide ke Eggliabfahrt chönne ha.

Freundschaftsrennen alpin

Em 9. Februar isches denn fös alpin Frundschaftsrenne besse gse. Dasjohr isch de Skiclub Stenegg dra gse mit de Organisation. Me hend em Morge mit em Rieseslalom gstartet ond hend fö da 95 Persone am Start kha. De Lauf isch super gse ond het einige Kniff dinne kha, so dass glich no e chli Usfäll ge het. D'Tagesbestzit bi de Herre het de Jan Haas vo Eggerstande erreicht, die bi de Dame d'Vivien Sutter fö Stenegg.

Em Nomittag isches denn – nochemere Vepflegig bim Roli i de Hötte – mitem Slalom witegange. Fö dese bünd sind denn no rond 75 Persone parat gstande. Au dei hemme en coole ond spannende Lauf kha. Wie scho am Morge hets gnueg Schnee abe ebe wechselndi Sicht kha. Do het de Michi Hänggi vom BW di schnöllscht Zit aniglät, bi de Dame d'Stefanie Gmönder – au vom BW. Insgesamt hemme e guets Renne chöne döriführe, au wenn ös öseri Zitmessig en Strech dö d'Rechnig gmacht het. D'Zite hemme zwo korrekt chöne uswerte, abe me hend alls mösse vo Hand öbeträge. Jäno – au seb chas emol ge. Ond isch emfall ganz siche nüd a menschlichem Vesäge glege – Ehrewoot!

Clubrennen

Em 23. Februar isch denn uf de Ebenalp öses Clubrenne ahgsät gse. Da hemme nochemere Johr Pause au chöne döriführe. Öseri schwaze Kollege hend em Morge en Slalom ufgstöltt. 42 Fahrerinne ond Fahrer sind fö de bi würllich schlechte Sicht parat gstande. Gse hetme nüd viel & de Lauf isch direkt gsteckt gse. Me chönt noch mene, dass de wo de Lauf gsteckt het em Voobed ade Faschned gse isch (jo ische). Em beschte z'Schlag cho mit de Vehältnis isch de Yves Ulmann, wo d'Tagesbestzit bi de Herre aniglät het. Bi de Dame isch d'Rahel Inauen – übrigens mit grad gad eme öbeschaubare Rückstand uf de Yves – di schnöllscht gse. Em Nomittag het denn d'Sicht no meh abgeh ond me het würllich kum me nebes gse. Luegid gad d'Foti ah! Glich sind denn 56 Persone parat fö de Rieseslalom gstande. Do het wiederom de Yves di schnöllscht Zit aniglät ond bi de Dame au wide d'Rahel. Insgesamt chöneme au do wide uf en sehr erfolgriche Ahlass zroggluege, wo unfallfrei het chöne abgeschlosse wede.

Skitour

Afangs April isch öseri Skitour onde de Leitig vom Roli plant gse. 10 Persone sind uf de Piz Uccello. Seu hend a dem Tag allebeschts Wetter kha ond hend en perfekte Tag chönne gnüsse. Wieme sieht isches denn onne inne auscho recht sommerlich gse. Noch eme italienische Stärkig sind seu denn glücklich, z'frede ond müed wide hee.

Clubabende

Nüd z'vegesse sönd öbe de Wenter öseri Cluböbed. Me sönd emol go Pizza esse, emol go Squashe i Schaies abi ond emol go Bowle in Säntispark.

Biketag

Em 24. Mai het wide ösen Biketag stattgfonde. Dasjohr hemme ös dezue entschede, zom s'Guide emol outsource. Me hend derom de Wolfi vo de Goodbike engagiert. E het 18 Tälnehmerinne ond Tälnehmer mit ond ohni Strom vo Untervaz uf de Pizalun gfuehrt. E Gegend wo kum nebed kennt het, au wennis vo dehem us gä nüd wiit eweg isch. Em Uniweg isches denn de einte ode andere scho echli z'waam wode. Da isch abe siche gad em superguete Wetter glege ond nüd dra, dass scho echli fescht ufwäts gange isch. Me sönd abe fö die Müehe denn mitmere coole Abfahrt belohnt wode. Natürlich hemme de Zmittag ondewegs nüd ossloh ond ganz onne hemme no e Efrischigsgetränk chönne gnüsse.

Bergtag

Metti Juni isch ösen Begtag ufem Programm gstande. Leider hend sich fö de Tag grad gad vier Persone Zit gno ond me het halbe chöne s'Gfühl ha sei e Doppeldate – sönd doch zwe Sutterbrüedere ond zwo Stegimeedle vo Ort gse. De Benedikt het ös dö de Laseyerwald öbe de Jägersteg is Bogartefenschte gfuehrt. Vo dei us sömme öbe d'Marwees i Seealp wome denn Znacht g'esse hend. Isch de ganz Tag ebe tüppig gse ond glich sömme zwäämol in Rege cho.

SCS @ Grümpeli

Me hend natürlich au möse anderi Verein ondestötze ond hend am Grümpeli zwo Mannschafte chöne stölle. Beidi Mannschaft sönd unfallfrei döricho ond hend e gueti Zit chönne gnüsse.

Tanz Dich Satt

Metti September isch denn schowide s'Tanz Dich Satt ufem Programm gstande. Mit viel Äbed het s'OK en toporganisierte Tag mit ondeschiedliche Musig ond Essensständ ufd Bee gstöllt. Leider het d'Wettervorhersag echli en Strech dö d'Tagesplanig vome Hufte Persone gmacht, au wennis em Schluss denn no ebe frei Wetter gse isch. Abe natürlich hend au all die Bands – seis vom DJ Purest öbe d'Laura Antonella ond em DJ Petz bis zo de AC/DC Revival Band – eren Tääl zome super Tag beiträged.

Ihrummete & Familienhock

E Woche spöte hend denn de Roli ond e paa fliessigi Hölfer d'Hötte wentetauglich gmacht. Em Sonntig ischsi scho s'eschtmol am Familigrillhöck gnotzt wode.

E wiites Vereinsjohr ischt Gschicht. Me hend dank de viele Hölfer wo ösem Verein intern ond au extern vo Vefüegig gstande sönd en Hufte cooli ond guet organisierti Ahläss chöne dörifuehre. I wettmi drom bi allne Lüüt, wo me ond minere Kommissionskamerade gholfte hend, vo ganzem Heeze danke. Gad dank Eu ond em guete Zemehalt i dem Verein isch da möglich. Me sönd au etz scho wide froh, wennme gnueg Hölfer ond Tälnehmer fö öseri Ahläss chönd gwönne ond freuid ös ufen super Wenter, gnueg Schnee ond schöni Stonde mit eu zeme.

Skiclub Steinegg

Appenzell, 25. Oktober 2025

Der Präsident Cornel Sutter